

漳平縣志

第四冊

漳平縣志卷九下

藝文志下

記下

碑

啟

引

祝文

詩

賦

銘

記下

新置學田記

陳天達

邑人

政莫大於教教莫急於養顧言教必於首乎四民者重之言養亦必於首乎四民者先之乃今之爲政者類以增戶口爲能以善催科爲最視興學造士諸本端直謂緩而不切高閣束之矣嗚呼德惟善政政在養民而於首乎四民者漫不加之意是未達政本也曾謂之爲政乎我查侯以兩浙名儒司牧平邑甫下車卽以興學造士爲首務見學宮頽圯捐俸謀新之其他興舉稱是一皆前人所不及爲不肯爲者而侯獨毅然爲之邑人口碑具詳無容縷述惟是荒殘之餘顧諸生爲貧所困惓然曰若操尺幅晤

咄圭華間者疏水或不給將無所藉以生何暇力學然是固吾責也因又捐俸四十金爲置田若干畝以續章縫之食使蓬蒿之士舉勿恤於饘粥焉吾於是歎侯之深達政本能知其大而務所急也夫人一行作吏遂忘其本來於韋布不啻蔑視也孰能捐己所有以惠之如我侯者乎且侯之自奉約嗇尙有寒士所不若者而捐己益人無難色且無德色此侯之所爲益難而非僅僅深達政本之足以盡之也平邑學田之置前此闕如崇禎間何舅悌太史來署教始以束脩資二十六金充置學田其爲之序有曰學田以贍士及其弊也公入耗蠹苜蓿之食又視之以爲外府寒士未必有絲毫之沾然亦在乎其人之公私非其制則虛也其言如是乃其所爲田亦幾不可問矣今侯能捐己所有以厚士而後來或有私之者其賢不肖之相去爲何如哉吾故推其意而紀之俾後之沐侯惠者知所感焉

學田記

曾炳邑人

我閩自甲寅之變雲擾波揚三閱暮始復覩蕩平然反側未安創痍未起
蝟聚蟻結尙未盡解散數十城亡絃誦聲者又幾易星霜也今山寧海晏
間歲而再歌鹿鳴聯翩鵲起頽宮一勾水方將養潛鱗奮健翮以爲邦國
光實惟我總制姚公之賜公以文武全材起家名解來典藩司已而
天子謂日南重寄非公不可

特授節鉞制全閩其戡定撫綏威德所屆凡在寓下類能言之而莫能盡
之也乃於投戈之餘卽爲講藝之舉旣教誨之矣而又飲食之通計閩中
郡邑爲學宮六十有六各捐金有差購產以贍貧寒其發給平庠若干金
置田若干畝惟我查侯猶慮奉行之不力經畫之弗詳或歷久而田畝削
於侵疆斗斛虧於去籍有辜上人德意也遂屬記其事而麗之學宮溯閩
自唐宰相常公袞爲觀察大興學校士始知學自是人文雲蒸霞蔚而立
三不朽者後先接踵皆日星麗而嶽瀆尊今去常公千餘載猶尸祝不衰

然當時特稱其興學耳未聞於常廩之外別立學田以嘉惠後學於無窮也今我姚公居尊體卑推貴及賤爲極盛之事施至渥之恩俾我後來多士毋以饘粥困其思毋以升斗窘其志得自感奮磋磨以彙征天家供舟楫鹽梅之用者皆公所培植也此其有造於後學視常公似遠過之炳起家平庠備悉平士當凋瘵之餘多齏鹽不給者今親見我公之周澤覃敷旣爲吾閩幸而尤爲吾平幸也於是乎書

重造浮橋記

林姓 藍采 邑人

單朝過陳眎其川無舟梁以爲廢先王之教而逆知其必敗國僑相鄭濟人以乘輿孟子謂其惠而不知爲政然則橋梁之造誠制治之大經而便民之急務平邑俯臨青溪溪之陽爲桂林壩人烟鱗駢物華輻輳蔚然與邑治相望故日用所需薪蔬果蓏之屬兩岸互相貿易輕舸小艇往來如織先是編役以渡食餼於官民猶稱便未幾裁之於是熙熙攘攘糜民間

金錢無虛日考之邑乘明正德九年邑長徐公始造舟爲梁鋪以板纏以鐵時當昇平爲費不貲民於是乎無病涉惟是溪納巖寧二邑之流水勢衝激春霖秋潦維解失時則波臣或負之而去故興廢不常靡有經久邇有橋以來至我

國初凡七締造或間六七年而一造者矣或曠百載而未嘗造者矣要其造也非其時之康阜則司牧之勤恤民也其未嘗造也非其時之凋瘵則司牧之墮乃職也然則是橋之廢興民風之愠阜吏治之純疵胥於此焉驗之豈細故哉橋圯於順治丁酉迄今幾三十年未聞有議復之者雖然橋之工費半在鐵鍊橋圯而纏存猶有待也甲寅之變兵戟洊興民間寸鐵搜括無遺於是以百餘年之遺纏悉化而爲海鏐山鐔嗟嗟是橋之振興寧復有日哉幸我邑侯查公蒞任蒿目津渡惻然動念卽以復建此橋爲己任然喪亂初平公私告竭因捐祿鍰爲士民倡擇父老之可任者使

董其事不用符牒文告科役編民工疇其直民勸而趨而積年久曠之盛
舉不亟不譁譁笑而集謂非侯之仁心爲質才略超羣曷克辦此夫前之
人所不能爲者侯毅然爲之前之人不能爲之於事半功倍民力稍紓之
時候毅然爲之於兵燹銷殘瘡痍甫起之日且又不聞拂民所不樂強民
所不勝以務遂乎一己之所欲爲也易曰通其變使民不倦神而化之使
民宜之查侯有焉因以知古人以橋梁覘治道治道果橋梁所能盡哉然
其濟人利物拯溺亭屯舉視諸此矣故君子以爲觀侯橋梁之造而二年
間之善政可以舉一而概也是烏可無記

朱子祠記

汀漳龍道 單德謨

漳爲朱子治郡故屬邑多祠祀焉平特闕以設邑肇自有明未之及也雍
正間學博蔡君復曰遴地於邑之東山始構數楹以祀以其鄉之陳剩夫
先生配左室則妥文昌甚盛典也諸生以時講學會文其間二十年於茲

矣余以戊辰夏觀察海邦輶軒抵平聞有朱子祠陟山拜謁見其規制多
缺略欲治之爰捐俸以爲之倡屬邑令趙君崇文司鐸官君偉曾君應選
偕邑之髦士共襄厥舉而委明經朱生陽等董其事越歲工竣來請余記
余惟朱子發前聖之微言集羣儒之大成而其學不外致知力行主敬存
誠今祠既增修歲時釋奠之餘諸生仍講學會文其間將登朱子之堂必
思志朱子之所志學朱子之所學而以知行相砥礪以誠敬相切磋以聖
賢爲必可學而至不徒習爲獵取科第之文斯於濂洛關閩之心傳一以
資之亦不虛今日修葺之雅意不然雖日取先賢之祠而塗墍之丹雘之
究與羽流縉客嘗飾梵宇者無異於身心性命何與也諸生勉乎哉昔朱
子守漳嘗遊平之聚賢里歎曰後必有真儒出至明果有陳剩夫先生與
北溪先生後先輝映迄今雖人往風微未嘗不流連懷慕想見其爲人余
觀平邑山有蓮花石鼓水有象湖鰲池秀靈之氣必有所鍾大儒之興間

世一生當更有繼剩夫而起者高山仰止景行行止雖不能至然心嚮往
之余於諸生有厚望焉諸生勉乎哉若修祠起訖之歲月及捐貲之姓名
董其事者自能列於牌陰乾隆己巳季夏記

重修縣城記

傅維祖

邑有城垣固圍衛民厥維要務邇漳平縣城創自成化成於正德歷今數
百載或頽一隅或崩數處或置而不修或修而不力予蒞任斯邑目擊情
形卽慨然有志兼承憲令飭修遂於丁巳之春問磚於陶購木於山取石
於溪命工召匠拮据經營領公銀以理其大綱竭綿力以治其細目謹按
城垣四面爲雉堞者四百二十有三爲門樓者四爲水門樓者二爲窩鋪
者四圯者建之壞者修之需用之料大磚二萬六千六百一十有八小磚
六百瓦二萬一千二百有十石子爲觔五十五萬二千三百石灰爲觔六
萬五千二百四十草爲觔一萬二百有五十編壁宜竹計担三十有二石

條爲塊計四百有五大杉三十有四中杉五十有四小杉一百六十有六
松板一百有四十需用之工木匠二百一十有一鋸匠一百四十有一竹
匠一十有八石匠四十有四泥水匠一千二百有七小工三千八十有一
施漆之工七需用之銀領諸藩庫者二百六十八兩零捐之養廉者二百
五十六兩有奇起工於五月之朔告成於九月之朔落成之日登高遠眺
四圍山色東有銀瓶西有龍停南有龍岐北有石鼓羅列環拱錯落增輝
雖彈丸邑不成雉堞一壯觀哉

龍亭改奉龍門書院記

傅維祖

一人立極於天下雲漢爲昭天下統治

一人乾坤起色蓋

天子居神京之內海甸要荒難瞻

鳳表故下土矢虎拜之誠省城郡邑特設

龍亭屆大典之期則虔奉公所而九叩山呼處尋常之日則端設

清宮而兩階肅靜平邑

龍亭舊在庫後移奉於關帝廟中覺非所宜歷任諸君子商所以易之而苦無其地余抵任亟謀之城隍祠之西向有龍門書院乃吾鄉范公諱廷謀者攝篆漳平時所建也房宇無多課業漸稀去歲新建菁城書院於佛仔山上師生移就而請業焉余因謀之紳士曰是院也可以供奉

龍亭乎夫建宇以造士爲

朝廷培養士類前人之志也今造士旣已有地卽以此宇敬奉

聖牌示民以尊

君之大義亦不悖乎前人之意也諸紳士咸以爲宜於是修葺改觀丹鉛黝聖行見體製軒昂恍若居中而制外規模整肅居然率土以來王矣雖然基實創自范公雅意不可以沒就其左廡另闢門庭坐西向廟而出

入僧人朔望奉其香火亦兩便之道也併俾後之溯源者有所考

重修關帝廟記

傅維祖

蓋蘭室葺房已屬巷衢之雅望而花宮仙梵更爲城市之雄觀若非加意以興修亦何新之不舊果爾真心以補葺又何舊之非新平邑地號龍門山圍雉堞民居稠密連烟火者千家神宇蕭疎壯巍我焉兩座城隍祠建鄰南市洵爲漳水之砥流關帝廟創自東門允作菁郊之關鎖調風和雨悉依二聖以扶持福國庇民咸賴兩神之赫濯第隍祠經前令之勸輸堂階整肅門第軒昂已宴飲於落成若關廟應現任之經營儀從傾頽簷宇剝落尙程工之未逮茲者捐薄俸以作倡喜襄事之多從欽惟 關聖大帝迺聖迺神允文允武自古英雄稱公稱王未有稱夫子猗歟超哉從來豪傑卽正卽直如斯卽聖賢蔑以加矣高人逸士動輒長楫傲公卿若美鬢公之遺像在茲自然稽首孝子義夫無過一方隆俎豆乃普天下之昭

承如是莫不感心今

朝廷賜祭春秋追封祖父誠千年之盛典在徵吏虔參朔望綏撫人民實一命之初衷懷桷重新丹鉛烜赫從茲畫棟雕櫺與隍祠之飛翬並峙行見金甌玉燭慶菁城之福曜長光迺若勦事督工則陳蓋韜李協五許愧芳李秀榮曾廷芳陳芳其住持僧人則定眉併記之

修南門臨溪道路小記

傅維祖

自紫陌塵飛那曉作亡牢之補楊州月白不知吹何笛之聲此皆春堤芳草而鳥道蟠雲者也平邑城南外臨深溪古岸高數十丈城脚有路通上下勿問修之何人第世遠年湮土崩石潰險仄不平往來苦之況屬城市通衢摩肩擊轂不知凡幾非亟爲之修則城上之孔道旣已平平而城下之長途不見蕩蕩未爲善策也因捐薄俸以倡邑之士庶亦樂爲之和迺召工人就溪取石倚岸築砌高不數尺鋪平其上是役也費省而工成勦

事之呂菊人與有勞焉從此示我周行映桂林而生色高才捷足按雲路以先登亦一快事也故記之

修創龍江橋渡記

傅維祖

漳平城外對望者爲桂林龍江隔之非渡莫濟淵深涯闊橋不可石因作虹橋於水面計船則三十六隻維以鐵纜兩岸人家一川風雨往來甚便但長泊中流歷久不無賴於修葺余用是審船之朽爛者庀材以補之鍊之殘缺者煉鐵以續之然遇山水駁發解纜分船以避衝擊臨河者未免興匏葉之嗟小艇問渡又恐有傾覆之虞爰捐己力造巨舟二木取堅厚工求牢固俾接踵問津得以穩坐無憂可以濟虹橋所不及渡者記之

東山書院租額記

汀漳龍道 楊景素

昔范文正公舍田五百畝而弗有以爲姑蘇學宮至今鑄石立祠無不頌公嘖嘖此地猶范文正公有之使當時自私而傳諸子孫由宋至今不知

其凡幾易姓恐非范氏之有矣故李九我先生謂范公之不有正范公之克有也余恒誦斯言亦欲告當世之有力者使不私其有乃長據所有耳歲乙亥余奉

簡命巡視汀漳龍龍之屬邑有菁城者山秀水清冽人文蔚焉邑令曹鑰謀所以養育而栽培之乃偕學博薛宸翰柯玠倡捐清俸建書院於邑之東山門堂壯麗學舍周廣聘名士招俊秀日省而月試之亦可謂盡心者矣猶慮書院之膏火未有也詢知舊書院有租八十六斗船橋租三十斗又昔有蔣君宗海者施佛寺租四百七十四斗寺久廢他僧混管有明間宗海同譜吏部蔣公蘭居告官清回因謀紳衿撥廢寺租合舊院橋租盡充書院膏火事聞於余余深嘉之所謂不私其有所以長有者乎既有當於余心不可不共成之余捐俸百金置租四十斗以益焉惜規模甫定未及充擴而曹令逝矣且夫善作不如善成善始不如善終前人之所以重

有賴於後人也新署令衛克瑄有志育才課學講業猶黽勉不倦復捐俸修路砌石開自東山寺南繞塔而行平坦爽塏直達縣城可以遠攬溪山近瞰村邑不特賢關義路之光亦爲遊覽者一勝也余又聞而嘉之以爲是皆志范公之所志而不有其財不有其力謀所長有以成前功而垂惠於邑人者也余旣喜其事之有成又恐其久而廢也飭將額坐址勒諸貞珉又據縣詳垂久章程書院田租官不收掌役不與聞僉舉誠實董事輪年收租專供延師修脯斯議可久并書諸石

重建儒學記

知縣 傅國勳

漳平 廟肇建於成化八年其制廟在前堂在後萬歷丙午災已酉重建廟堂並峙

本朝修自康熙甲子歲遠年深棟朽柱蝕不堪補葺乾隆丙子余承乏茲土仰圖整理未敢輕舉值弟子員信青烏家言爲科舉計羣請重建是

可因機而鼓舞之乃與學博陳公煥世商勸助豐贍者施財幹濟者効
力甫成議而陳公以內艱去事復寢適庚辰秋司鐸鄭公良翰來更共
商定厥制量移於左鳩工庀材余朝夕督視不敢懈於是鄭公同項公
思趙尉明山日偕諸董事共葺厥事而明倫堂緣新址遜其右並重建
焉咸與維新甲申正月釋奠告成事諸生雍容俎豆靡不欣然色喜爰
進而勗之曰廟之新修豈徒爲科舉哉程子云學以道爲志人以聖爲
志朱子云不是科舉累人自是人累科舉閩自楊游得傳聖學於濂洛
南來大儒繼承日盛子朱子集其成眞西山衍其緒今從祀廟中十有
餘賢而北溪陳安卿爲朱子高弟固漳郡人也平非漳之舊乎有志者
可仰俎豆思奮卽以科舉論眞西山非廷對第一乎諸生入廟思敬近
文章砥礪廉隅尊聞行知而進於高明光大乃不愧駿奔走在廟矣若
夫獻俸助金皆職分所當爲且稽闕里廟制亦多未備蓋有俟也謹紀